

Richard Goeloe a fayeré inesperá


Un persona ku amor grandi pa historia a bai

KRALENDIJK -- Richard Goeloe a fayeré inesperá djaluna na Aruba, na unda el a nase i biba parti grandi di su bida. E tabata un persona no solamente fasiná pa historia, sino a hasi tambe hopi esfuerso pa dokumentá un parti desconosí di historia i kultura di e isla aki, basá riba loke su tata a graba laga tras riba 25 kasèt. Tambe el a investigá historia di sklabitut i di e personahe Cornelis Marten, Papa Cornes.

Richard Goeloe a nase na Aruba dia 8 di yüni 1949 komo un dje 10 yunan di Leon (Yon) i Mathilda (Shon Ti) Goeloe. Nan a

lanta na San Nicolas, Weg Roi Hundu. Despues di kaba MULO Richard a haña un beka di Lago pa studia na Hulanda. El a biba na Enschede i tabata studia na Hengelo. Pero el deskontinuá su estudio, pasobra su konosementu di idioma hulandes no tabata na un bon nivel.

Richard Goeloe a konta: "Mi a regresá Aruba. M'a kaba e ora ei mi HBS, traha un temporada pa OGEM, pa despues bolbe bai bèk Hulanda ku beka pa studia. Ei mi a studia komo dosente MO Wiskunde, pero nunca a para dilanti klas. Via un 'uitzendburo' m'a



yega na DAF pa traha den e sektor di outomatisashon. Na momentu ku DAF a separá su produkshon di trùk for di outo, m'a bai sigui traha pa e parti di outo bou di e kompania Volvo."

'Asina bida ta'

Na sierto momentu Richard Goeloe a regresá Aruba. Aki, gosando di su

penshun, el a haña interes pa studia historia. Si trabou a kuminsá ku transkripshon i redakshon di 25 kasèt di grabashon ku su tata Leon Goeloe a laga tras. E forma ku el a hasié ta atmirabel. Richard a skirbi biografia di su tata den forma detayá, kla pa publiká den un buki. E parti di bida di su tata na Boneiru i Kòrsou el a pone den ortografia fonológiko i e parti di Aruba den ortografia etimológiko.

Algun aña pasá Richard Goeloe a outorisá pa Extra publiká e seri aki riba djasabra bou dje título 'Asina bida ta'. E reakhonnan tabata enorme. Hopi kos desconosí di historia i kultura boneriano a bini dilanti.

Historia

Trahando riba transkripshon i redakshon di 'Ta

asina bida ta' Richard Goeloe a bin haña interes pa historia di Boneiru. Entre otro pa e personahe Cornelis Marten (Papa Cornes) ku a hunga un papel importante den historia di kato-lisismo na Boneiru. Mas aleu Richard Goeloe a haña interes pa skirbi di sklabitut. El a publiká su artíkulonnan tokante Papa Cornes i sklabitut na Boneiru den Extra.

Deseo grandi di Richard Goeloe tabata pa publiká e biografia di su tata den forma di buki. A plantea e deseo aki na tantu UNOCA komo Prins Bernhard Natuur en Cultuurfonds. No ta konosí ku a sigui traha ariba. Lástima ku e no por a mira publikashon di su obra. Pero, 'ta asina bida ta'.

Kondolensia na su famianan, pas na su alma i su restunan.